

## lis Gnovis

## ■ CJASARSE.

## Memoriis de deportazion

In grazie de mostre «Ribellazioni. Quando la storia ti passa accanto», screade ai 25 di Avrìl, la Comunità di Cjasarse e podarà memoreà e confrontàsi cu la tragedie de deportazion. Li de viere canoniche, fintremai ai 2 di Jugn, e restarà imbastide un'esposizion ch'è presente i biliets che i depuartâts, di strade viers i «Lager» dal Tierç Reich, a butavin dai trens par visà lis sôs fameis e lis letaris che i fruts de «Azion catoliche» di San Zuan a prepararin par spediju a chês biadis fameis, tocjadis de disgracie. Dongje de colezion di Luigi Bozzetto, la mostre e presente i ricuarts dal depuartât Mario Bertolin, lis testimoniancisc su la vuere tiradis dongje di Sandro Susanna e di Loris Mior e il dissen di Renzo Tubaro pal monument dai partisans di Cjasarse. La rassegne e je vierte di sabide, di domenie e tai dîs di fieste (10.30-12.30 / 15-19).

## ■ PORDENON. Valorizà i teritoris cu la «Co-projetazion»

Par fâ cressi i teritoris al vûl valorizât prin di dut «lis capacitâts gjenerativis de Comunità local», inviant formis positivis di «co-projetazion partecipade» e di «colaboracions cross-setoriâls»: al è ch'est il struc de analisi di Lucilla Moro sul percors metodologic inviat dal Servizi social dai Cumons dal «Ambito Noncello» par realizà une piçule «Fattoria didattica e sociale», a Pordenon. La contribuzion di Moro, «Dove ci sono ancora terra e cielo», e je stade publicade tal lûc internet di «Percorsi di secondo welfare» ([www.secondowelfare.it/collaborare-e-partecipare/dove-ci-sono-ancora-terra-e-cielo/?ut...](http://www.secondowelfare.it/collaborare-e-partecipare/dove-ci-sono-ancora-terra-e-cielo/?ut...)), ch'al è un servizi dal Dipartiment di Sciencis socials e politichis de Università di Milan.

## ■ UDIN. Un lûc gnûf pe «Patrie»

Ai 6 di Mai, la clape «La Patrie dal Friûl», ch'è je ch'è stampe ancjemò in zornade di vuè il sfuei fondât di Felix Marchi e di pre' Josef Marchet, e à rinovât il sò lûc internet. La gnove version dal servizi informatif e je stade curade di Andrea «Dree» Venier, cul jutori de «web agency» di Fulvio Romanin, «Ensou». In plui di proponi i articui dal mensil (doi mès dopo de publicazion su la cjarte), e sarà ufierte la leture dai numars storicis, ch'a àn tacât a saltà fûr dal 1946. Ma la gnove plui grande e sarà la pussibilitât di scrutinâ ducj i servizis in formât «mobil», te version dedicate ai celulars.

## ■ MONFALCON. A pro dai Venits dal Friûl

La Regjon Venit e à publicât un regolament par finanziâ azions di protezion e di valorizazion dai dialets venits. I jutoris a podaran jessi domandâts ancje dai Ents publics, des clapis e des organizacions culturâls ch'a operin tai Cumons dal Friûl e de provincie di Triest dulà che si fevele ancje par venit. Lis informazzions su l'iniziativa si cjatilis a la direzion: <https://bur.regione.veneto.it/BurVServices/pubblica/DettaglioAvviso.aspx?id=473849>. Il regolament al ten cont dal compatât fra lis Regjons Friûl-V. J. e Venit par valorizâ, cence discriminazzions amministrativis, lis identitâts linguisticis des Comunitàs furlanis e venitis, di ca e di là de Livence e dal Tiliment.

Mercus 11 S. Ignazi di Laconi

Joibe 12 Ss. Nereu e Achileu

Vinars 13 La Madone di Fatime

Sabide 14 S. Matie auestul

Domenie 15 V Domenie di Pasche

Lunis 16 S. Ubalt vescul

Martars 17 B. Antonie M. di Orgosolo

Il timp Temperaduris dolcis



**Il soreli**  
Ai 11 al jeve aes 5.40  
e al va a mont aes 20.28.



**La lune**  
Ai 16 Lune plene.

**Il proverbi**  
Gjave e no met,  
ogni fontane e reste a sec.

**Lis voris dal mès**  
Bagnait lis plantis butant aghe sul teren  
dongje la lidris e no su lis fueis.

## Unîts te stesse Cjase

Dai 22 ai 29 di Mai,  
e torne la «Setemane  
Laudato si'»

Dai 22 ai 29 di Mai, e torne la «Setemane Laudato si'», par fâ memorie dal VII cjadalan da la publicazion de Letare encicliche di Pape Francesc su la «curie de cjase comugnâl», «Laudato si'», cu la pussibilitât di tornâ alfin a inmanea appuntamenti di ogni fate cence lis improibizzions de pandemie.

Di ch'è strade de iniziative mondiâl, co-ordenade dal «Moviment Laudato si'» e prudelade dal Dicasteri vatican pe promozion dal svilup uman integrâl, dutis lis Comunitàs catolicis dal mont e ogni cristian a varan l'oportunitât di resonâ sun cemût ch'a son daûr a rispuidi al berli dal Creât di Dîu, su la strade de «Conversion ecologjiche». Pal «Moviment Laudato si'», intant de setemane, i catolics a varan d'indalegrâsi «pai progrès otignûts vivint Laudato si' e, dal sigûr, a infuortissaran i siei impegnis par meti in vore i principis de Encicliche. La Glesie catoliche, rapresentant un cuint de popolazion mondiâl e organizade sù par jù in 220 mil Parochiis, e pues vè un puest impuartant par distrigâ la disfidè dople de emergenza climatiche e de crisi ecologjiche». Un jutori positif, in ch'est impegn, al diven de gnove «Laudato si' Action Platform», ch'è jude lis istituzzions, lis Comunitàs e lis fameis catolicis a meti



La «Camminata per la Terra», di Zui a San Pieri, intant dal «Timp dal Creât» dal 2021

La Glesie  
catoliche  
e mostre trop  
ch'è à savût  
operâ  
pe Conversion  
ecologjiche

in vore «Laudato si'». Il timp par notâsi te plateforme vaticane al larà indevant fint ai 4 di Otubar, fieste di San Francesc.

La «Setemane Laudato si'» dal 2022, cul titul «Scoltant e cjaminant insieme», e intint d'insedâsi tal percors sinodâl e di invidâ ducj i catolics a lassâsi ispirâ dal invît dal numar 13 di «Laudato si'» a «congregâ la famee umane par protezi la nestre cjase comugnâl». Ogni dì de setemane, al sarà programât un apontament mondiâl par promovî «l'impegn catolic su la biodiversità, la rispueste al berli dai puars, il disinvestiment da lis risultivis incuinantis, l'educazion e la spiritualità ecologjiche». Ma in plui des convignis mondiâls, a son daûr a jessi programadis

iniziativis localis di ogni gjenar par che la buine gnove de «Laudato si'» e jentri te vite cotidiane di ogni cristian e di ogni Comunità.

Par chel, il «Moviment Laudato si'» al invide a dâsi in note tal lûc internet <https://laudatosiweek.org/it>. A la direzion <https://laudatosiweek.org/it/home-it/>, si po regjistrà lis iniziativis localis programadis dilunc i vot dîs de manifestazion. Po daspò, al à stât prontât un «Kit» - <https://drive.google.com/drive/u/0/folders/1E2JZa47S0PSDA00k9gOfCN1Yy4PFBRv1> - cun risorsis praticis par popolarizâ il mes de «Setemane Laudato si'» (manifestcj, comunicâts, imprescj pes rêts socials e vie indevant).

Mario Zili

## In vore la farie de sostenibilitât di Pordenon

A Pordenon, e je partide la XIII edizion di «Terra», la rassegne de «farie da la sostenibilitât» dedicate a la promozion di mûts di vivi sostenibilis, tai setôrs energetic, ambientâl, economic e social. L'edizion di ch'est an e je intitulade «Piantiamola!» e a proponarà i siei appuntamenti fintremai ai 23 di Mai. Il program al è publicât tal lûc internet [www.terra-e.it](http://www.terra-e.it) e, te seconde setemane di appuntamenti, al profundissarà lis cuistions: «Api... non solo miele!», «Noi siamo natura: dalla crisi ecologica alla costruzione di un nuovo rapporto con il Pianeta», «Fermenti, che passione! Incontro teorico-pratico sugli alimenti fermentati» e «Speranza attiva».



## Messe in marilenghe

A Udin, la Messe par furlan e ven cjantrade ogni sabide, a 5 e mieze sorelere (17.30), li de capele de «Puritât», daprûf dal domo. Sabide ai 14 di Mai al cjantrarà messe pre C. Bevilacqua. Radio Spazio e trasmet sul moment, ogni setemane, dute la celebrazion.

## DEDEÀ. Cjaminade e spettacul teatrâl



Sabide ai 14 di Mai, tor dîs di buinore e ven organizade la cjaminade daprûf de roie dal ex mulin (cumò «Immaginario scientifico») di Dedeà, fintremai a Dedeà pais, vuidats di Sandro Comuzzo e Oscar Della Maestra. Simpri sabide 14, a nûf di sere intal oratori «Sant Clement» di Dedeà o vin il plasê di ufri in presince la raprezentazion teatrâl «Rojale» scrite di Carlo Tolazzi, musicis di Claudio Parrino, cu la «Companie dai guitti» di Remugnan, dentri de Setemane de cultura furlane de Sff.

## Tradizzions furlanis dal mès

par cure di Mario Martinis

## IL ROSARI

La rose, clamade «regjine des rosis» pai siei cetancj simbolisims, e je stade peade ancje ae Madone, «rose des rosis», tant che i è stât dedicât il «mès des rosis», vâl a di Mai, cu la pratiche dal rosari. Za il mont roman al fiestezave vie pe Vierte Flora, Bona e Maia, divinitâts che vuardavin il timp des rosis e si sa che daûr di lôr, di fat, si platave la figure de Mari Grande. I simbui di cheste grande divinitât i cristians po ju trasferirin propri ae Madone, Vergjine Mari di Jesù Crist, sacralizant ancjemò une volte lis antighis usancis paganis in onôr de vivarose nature in flôr. Ma al fo dome te Ete di Mieç che si metè adun in maniere clare la Madone al mès di Mai e si inmanea la pratiche dal rosari, che podopo e vigni rinfuarçade des aparizzions di Fatima e Lourdes ma ancje de definizion dal dogme de Imaculade Concezion proclamât de Glesie tal 1854. Fin tai agns Sessante dal Nûfcent dutis lis seris di Mai tes glesis di ogni pais furlan si tignive il rosari, fat di 50

Ave Marie, 10 par ognidun dai misteris gaudiôs (lunis e joibe), misteris dolorôs (martars e vinars) e misteris gloriôs (miercus, sabide e domenie). Une volte, tante int e lave a di rosari in glesie, massime vielis, feminis e fantatis. La presince des zovinis e clamave dongje ancje tancj fantats, che cussù tornant a cjase dilunc lis stradis, tes placis e sot dai arcs dai puartons, a podevin biadelore fevelâ cu lis fantacinis e cirî la lôr simpatie. Lis funzions dal rosari a finivin te cuarte domenie di Mai, dispès cu la fieste de prime comunione dai fruts celebrade a Messe grande, intant che tal dopomisdî si cjantavin i Gjespui solens pe sierade dal «mès marian». Soredut tai pais che vevin la glesie o l'altâr dedicât ae Beade Vergjine dal Rosari (fieste fissade ai 7 di Otubar) o dulà che ancjemò a esistevin lis antighis Confraternitis dal Rosari, e jere tradizion la recite del rosari ancje tal mès di Otobar, dispès fate prime o dopo la messe de buinore, considerant lis seris umidis e curtis dal autun.